



## Universitätsbibliothek Paderborn

### **Qvæstiones Morales Selectiores De Lege Interna Et Externa**

discussæ, ac Resolutæ, & in duos Libros divisæ, In quibus, propositis casibus, prima quædam principia, ad plurimas alias Quæstiones similes resolvendas perutilia, subinde examinantur

[De Lege Interna]

**Beati, Gabriele**

**Augustæ Vindelicorum, 1729**

**VD18 90108957**

5 An opinio probabilis, possit esse regula operandi.

**urn:nbn:de:hbz:466:1-39908**

## Q V A E S T I O V.

*An opinio probabilis possit esse regula operandi.*

C A S V S .

**C**LERICVS quidam, cum, graues aliquot Autores legens, inuenisset, beneficiorum pluralitatem, iure naturali, non esse prohibitam; tum quia Pontifex de facto in illa dispensat; tum quia haec pluralitas videtur iam consuetudine introducta, *exc. iam dudum de p̄ebend.* tum quia multi viri docti, ac timoratæ conscientiæ plura de facto beneficia possident; tum denique quia, ut ait Card. in d. c. *iam dudum;* alias totus mundus damnaretur; tria beneficia satis pinguia sibi procurauit, ac obtinuit. Post aliquot vero menses, dum legeret D. Thomam, inuenit, beneficiorum pluralitatem, iure naturali, esse prohibitam; quia contra rectam rationem videtur esse, quod unus, plurimum stipendia, alimenta, ac præmia habeat; quod Ecclesia priuetur pluribus ministris sibi debitibus; quod cultus diuinus minuatur; quod tempora labantur; quod detur locus ambitioni, ac avaritiæ; quod iustitia distributiua non serueretur; quod Fundatorum intentio fraudetur; quod multi Clerici pauperes magis idonei, suâ idoneitate frustrentur &c. His tamen non obstantibus, beneficia obtenta retinuit; quæritur: vtrum, ea retinendo, mortaliter peccauerit.

## S V M M A R I V M .

- 2 Conscientia, quid sit.
- 3 Conscientia probabilis; quid sit.
- 15 Quid sit, esse probabile, & quid ad hoc requiratur.
- 16 Assensus opinatiuus, est voluntarius.
- 17 Quomodo voluntas, ex opinione probabili, prudenter operetur.
- 18 Operatio ex opinione verè probabili, ex duplice capite est prudens.
- 19 Opinio probabilis, non est regula immediata operandi.

R. P. Beati Lib. I.

- 20 Dictamen, quod est regula immediata, operationem non præcipit, sed permittit.
- 21 Opinio remanet probabilis, etiam presentibus motiuis oppositis.
- 22 Quomodo una opinio sit alia probabilius.
- 23 Clericus, cum opinione probabili, plura retinens beneficia, non peccat.
- 25 Opinio probabilis est rationabilis, & prudens.
- 26 Causat iudicium euidens, de honestate illis conformandi.

D

27 Vo-

- 27 Voluntas illi se conformans, prudenter operatur.
- 28 Et certo scit, se prudenter operari.
- 29 Est etiam certa, quod intellectus prudenter proponit operationem, ut licet.
- 30 Si usus opinionis probabilis esset illicitus, fere nunquam licite operaremur.
- 31 Sequi opinionem probabilem est actus prudentiae.
- 32 Opinio probabilis aliquando etiam obligat.
- 33 Qui eam sequitur, nulli se periculo expponit.
- 34 Nec formido partis opposita, obstat.
- 35 Cur voluntas, opinioni probabili se conformando, peccare non posset.
- 41 Motiva probabilia, ex Imperio voluntatis, contemni possunt.
- 42 Intellectus, tunc est voluntati perfekte subordinatus.
- 44 Voluntas, peccandi periculo se non expponit.
- 45 Experientia constat, intellectum à voluntate determinari.
- 46 Intellectus utramque partem iudicare simul potest probabilem.
- 47 Assensus opinarius, est regula operandi, solum radicalis.
- 48 Usus opinionis probabilis, conscientias non relaxat.
- 49 Cum opinione probabili datur iudicium certum, de honestate operandi.
- 50 Ex vi ipsis iudicij operamur.
- 51 Opinio, eo ipso, quod est vere probabilis, est tuta.
- 52 Nulla dari potest minus tuta.
- 53 Est equè prudens, ac tuta, sine fauceat precepto, siue libertati.
- 54 Quae non est certo probabilis, non est tuta.
- 55 Illa sola est tuta, de qua dubitari non potest, quin sit probabilis.
- 56 Probabilitas, non idem significat, dum dicitur de opinione, ac de alijs rebus.
- 57 Quae opiniones sint practice improbables.
- 58 Opinio est similis fidei, praesertim humanae.
- 59 Quae formido honestatem operationis impedit.
- 61 Doctrina de opinione probabili, est communis.
- 63 Eius electio est licita, in quacunque materia.
- 64 Etiam si rationum oppositarum ignoratur solutio.
- 65 Etiam alterius opinio potest esse regula operandi.
- 66 Subditus sequi potest opinionem Superioris.
- 67 Opinio probabilis potest esse regula in materia iurisdictionis.
- 68 Et in materia consilij.
- 69 Etiam in materia litis.
- 70 Etiam opinio speculatoria est licita, cum nihil obstat.
- 72 Potest opinio evadere improbabilis, & è contra.
- 73 Quid sit probabilitas logica, quid moralis.
- 74 Quae auctoritas ad prudentem fidei assensum requiratur.
- 77 Syllogismus, cuius conclusio, est dictamen prudentiae.

## RATIONES DUBITANDI.

**S**icut conscientia erronea, potest esse 2 regula recte operandi, ita certum est,

est, hoc ipsum, à fortiori, præstare posse conscientiam probabilem; Nomine tamen conscientiae, non intelligimus hic, ultimum iudicium practicum, prærequisitum, ex parte intellectus, ad rectè operandum; nam hoc, certum est, esse semper certum, ac euidens, cum sit actus prudentiae, quæ, cum sit virtus intellectualis, fertur semper certo, & euidenter in verum. Dum enim format hunc syllogismum. *Voluntas amplectens*, quod illi ab intellectu prudenter proponitur ut bonum, rectè operatur, & peccare non potest, quia, cum sit potentia cœca, ad aliud non tenetur: Sed hic & nunc, voluntati prudenter proponitur hoc, vel illud obiectum tanquam bonum, ut constat experientia. Ergo voluntas hic & nunc, illud amplectendo, peccare non potest, sed rectè operatur. Conclusio hæc, quæ est actus prudentiae, ultimo prærequisitus ex parte intellectus ad operandum, est certa, ac euidens, & ex præmissis euidentibus, deducta. Verum, quia est actus reflexus, de eâ communiter non loquuntur Auctores, sed illam supponentes, nomine conscientiae, intelligunt actum illum, quo, in minori assertur, ab intellectu voluntati directe proponi aliquid, tanquam bonum, vel malum, honestum vel dishonestum; Nam hic solus est, qui potest esse aliquando verus, aliquando falsus, aliquando probabilis; & conscientiam diuidit, in rectam, erroneam, ac probabilem; Dicitur autem conscientia, quia hic etiam actus, cum sit requisitus, ex parte intellectus, ad rectè operandum, dici potest aliquo modo regula operandi.

**3** Quæstio igitur est; an, sicut iudicium

directum, voluntati falso proponens aliquid tanquam bonum potest illi esse regulæ recte operandi; ita hoc præstare possit simile iudicium, eidem voluntati proponens aliquid, tanquam bonum, non falso, sed probabiliter; quamvis enim pars affirmativa fuerit semper apud Antiquos indubitate, & in Ecclesiâ receptissima, quia tamen aliqui, nomine probabilitatis abundantes, quamlibet opinionem statim assertunt, ut probabilem; aliqui vero, nomine conscientiae, siue opinionis probabilis, intelligentes ultimum illud iudicium practicum, quod præquiritur ex parte intellectus, ad recte operandum; quasi hoc assertur posse esse solum probabile, in opinionem probabilem acerimè inueniuntur, fingentes sibi hostem, eumque plurimis argumentorum telis confodientes. Ideo, ut opinio verè probabilis, ab apparenter solum probabili discerni possit, & quærelæ, ac rationes, à Recentioribus, contra opinionem probabilem, coaceruata, pœnitus euanscant; examinandum est, quid requiratur, ut opinio aliqua dici possit verè probabilis; sic enim clare apparebit, quām immerito oppugnetur, & quām rationabiliter à Sapientioribus, ac Theologis, imo à totâ Ecclesiâ, fuerit semper admissa, nec aliter omnino fieri possit.

Aliquis ergo, Clericus videtur mor- 4 taliter peccasse: ita Caietanus v. opinio c. 2. & Summis, quos refert, & sequitur Paulus Comitulus lib. 5. resp. mor. qu. 15. Marenda tract. de Consilio. Iulius Mercurius, de opinionum probabilitate par. 2. ar. 4. 7. & 8. qui plurimos auctores pro vtrâque parte, recenset. Peierinus tom. 3. c. 1. nu. 10. Candidus Phalethius, opusc. de praxi opin. quest. 5. & quidam alij recentiores.

5 Probatur primò; Quia Clericus, per apprehensionem motiuorum contra beneficiorum pluralitatem, caput esse dubius; caput enim habere proposita motiuia pro vtraque parte contradictionis, & fere aequalia; unde ad neutram partem determinare se potuit, cum non magis inclinaretur ad unam, quam ad aliam; operari autem cum conscientia dubia, est intrinsecè malum; est enim operari sine regulâ, & peccandi periculo se exponere.

6 Secundo; Quia, post aduentum motiuorum contra beneficiorum pluralitatem, retinere non potuit opinionem probabilem, quam antea habebat ex motiuis oppositis; cum enim opinari, sit assentiri vni parti, cum sola formidine, ortâ ex ineffaciâ motiui, quod omnino non convincit, non potuit Clericus, post aduentum motiuorum contra beneficiorum pluralitatem, habere solam formidinem ortam ex ineffaciâ motiuorum, quibus innitebatur, sed necessariò caput etiam positiuè timere de falsitate partis, cui adhærebat, propter aequalem, & fortasse maiorem efficaciam motiuorum partis oppositæ; Ergo non habuit amplius opinionem probabilem, sicut antea, sed potius dubium. Cum dubio autem, plura beneficia retinere non poterat, quia peccandi periculo se exponebat.

7 Tertiò; quia; Clericus, post aduentum motiuorum contra beneficiorum pluralitatem, de neutra parte opinari amplius potuit; eo enim ipso, quod iudicauit, vtramque partem contradictionis, esse aequalis seie probabilitatis, iudicauit, vtramque partem, non minus apparere veram, quam falsam, cum quodlibet motiuum, quo magis suam partem facit appet-

rere veram, eo magis oppositam faciat appetere falsam; dum autem obiectum æqualiter apparet verum, ac falsum, de illo opinari non possumus, quia iudicare non possumus, obiectum esse verum cum sola formidine, quod sit falsum; ergo Clericus, propositis motiuis contra beneficiorum pluralitatem, operari amplius non potuit, ideoque necessario caput esse dubius. Et ratio à priori est, quia motiuia vnius partis, licet, quantum est ex se, & seorsim à motiuis oppositis, sint sufficiens ad causandum assensum opinatiuum, ab aliorum tamen præsentia impediuntur, ne de facto causet; sicut pondus in vna parte lancis, licet ex se, sit sufficiens grauare, & lancem inclinare, à pondere tamen alterius partis impeditur, ne de facto illam inclinet; sive laluatur, vtraque motiuia esse probabilia, & vtraque suo effectu carere, & consequenter intellectum nenti parti assentiri posse.

Quartò; Quia, nemo prudenter, ex 8 duobus similibus pociulis, alterum eligeret, si sciret, in eorum altero venenum esse permixtum; Neque in biuio positus, alteram ex duabus vijs, quatum altera latronibus esset infesta; Aut alterum ex duabus nauigijis, quorum, alterum passurum esset naufragium. Ergo neque Clericus, alteram ex duabus partibus probabilibus prudenter eligere potuit, cum earum alteram sciret, esse falsam.

Quinto; Quia, si Clericus, propositi motiuis contra beneficiorum pluralitatem, perseverasset in suo assentio probabili, quod eorum pluralitas esset licita; necessario indicasset, opinionem oppositam esse simul falsam, & veram; falsam quidem, dum suam iudicauit veram;

tum



tum quia, idem saltem virtualiter est, affirmare, suam esse veram, ac oppositam esse falsam; sicut idem virtualiter est, amare aliquod bonum, ac odio habere malum oppositum; tum quia, utramque simul veram iudicare non potuit; Veram vero, quia iudicauit, esse probabilem; imo fortasse probabiliorum, hoc est, sibi apparere veram, vel magis veram. Consequens autem est impossibile, ut per se patet; quid enim absurdius, quam eam opinionem iudicare falsam, qua sibi vera, imo magis vera videtur, & è contra; perseverare ergo Clericus non potuit in assensu probabili, quem habebat, & consequenter remansit dubius, ac sine regula operandi.

10 Sexto; Quia, etiam si concedatur, Clericum, post propositionem novorum motiuorum, retinuisse assensum probabilem, quem antea habebat, adhuc assensus ille non potuit esse sufficiens regula recte operandi: hæc enim debet esse dictamen prudentiae, certum, & infallibile; Opinio autem, non est certa, nec virtus, sicut est prudentia; Ergo Clericus, beneficia retinendo, siue sufficienti, & debiti regula, operatus est, & consequenter peccauit.

11 Septimo; Quia, si Clericus utramlibet opinionem eligere potuisset, nimia daretur licentia operandi; nulla enim daretur regula morum, sed unusquisque, pro suo arbitrio, ac opinione, quidlibet agere fere semper posset; ducereturque potius opinione, quam certa scientia, cum res morales, ut plurimum, in opinione sint politæ, & habeant opiniones utrumque probabiles. Consequens autem sine maxima perturbatione, ac scandalo, ad-

mitti non potest; posita enim semel hac libertate sequendi opinionem probabilem, omnes ferè leges redderentur inutiles, quia impune violari possent, sequendo opinionem probabilem; & conscientia nimis laxarentur, quia nullam aliam legem agnoscerent, quam propriam opinionem; quo quid absurdius?

Octavo; Quia, si Clericus perseverans in sua opinione probabili, ex vi illius certificari potuisset, se hic & nunc, non peccare illam eligendo, nemo unquam peccaret, sequendo conscientiam dubiam; non enim datur conscientia dubia, nisi cum aliqua probabilitate; sic, cum dubito, an mihi, hic & nunc, scribere liceat, hoc ideo est, quia habeo rationes probabiles utrumque propositas; Si ergo motiu illa probabilita, etiam praesentibus oppositis, Clericum certificare potuerunt de recta operatione, sequitur, omnem conscientiam dubiam esse certam, vel saltem habere motiu, quo possit certificari: sive nullus unquam dabatur, qui ex conscientia dubia operetur.

Nono; Quia, qui sequitur opinionem probabilem, nunquam certus esse potest, se recte operari, sed de hoc solum probabilitatem habere; si enim Clericus probabiliter tantum iudicauit, beneficiorum pluralitatem, esse licitam; ex hoc assensu probabili, deducere non potuit assensum certum, quod sibi hic & nunc licitum esset, plura beneficia procurare, sed solum probabilem, cum conclusio maiorem certitudinem habere non possit, quam præmissæ, & hoc indicium practicum, ex præmissis tantum probabilibus sit deductum; Consequens autem est absurdum; qui enim non est certus, se recte operari, sed

D 3 aliquo

aliquo modo dubitat, sive formidat, num recte operetur, sic operando, peccandi periculo se exponit, ac peccat; ideoque recte operari non potest; ergo regula operandi, debet esse, iudicium certum, non vero solum probabile. Hoc autem argumentum euidenter ostendere videatur, sequi nos in praxi non posse opinionem probabilem.

## NOTABILIA.

**14** **H**ec, & fere similia sunt Recentiorum argumenta contra opinionem probabilem, quae, quam parum roboris habeant, facilè ex ipsa opinionis vere probabilis natura, ac conditione, constabit.

**15** Aduertendum igitur est primò; opinionem aliquam esse probabilem, nihil esse aliud, quam opinionem illam, ex vi suorum motiuorum, ita apparere veram, ut mereatur, sive sit digna assensu opinatio; sicut misterium aliquod Fidei esse credibile, nihil est aliud, quam misterium illud taliter proponi, ut mereatur, sive sit dignum assensu fidei. Ad hoc autem, ut opinio, tali assensu sit digna, necessario requiritur, ut nitatur motius, quae habeant vim euidenter ostendendi de illa, apparentiam veritatis, sicut hoc ipsum etiam, suo modo, requiritur in assensu fidei. Motiva vero, tunc habent hanc vim, cum à pluribus Doctoribus firma, solida, ac persuasiva iudicantur, nec ullam rationem conuincentem, contra se, habent; eo enim ipso, ita reddunt opinionem apparenter veram, ut de ipsa apparentia veritatis prudenter dubitari non possit. Hoc autem sufficit, ut iudicetur digna, quae ab

intellectu prudenter credatur, & à voluntate prudenter ad praxim reducatur; sicut enim fidei assensus, quia procedit à iudicio credibilitatis, est prudens; ita assensus opinatiuum, cum à simili iudicio probabilitatis procedit, erit prudens. Hoc autem iudicium, cum omnem actum voluntatis præcedat, semper est, saltem moraliter certum, ac euidentes; alioquin intellectus, ad illud formandum, ab obiecto determinari non posset.

Aduertendum est secundò; assensum **16** opinatiuum, non minus esse nobis voluntarium, ac liberum, quam assensum fidei; cum enim intellectus ab obiecti euidentia non cogatur ad assensum, sicut nec cogitur in fide, sequitur, quod remaneat subordinatus voluntati, & ab ea ita dependens, ut, vel determinari ab ea possit ad assensum, vel impediri, sicut potest in Fide. Quoniam vero motiva probabilia proponi possunt, aliquando solum pro vna parte, aliquando pro vtrâque hinc sit, ut etiam intellectus, aliquando à voluntate determinari solum possit, vel ad assensum, vel ad omissionem assensus; aliquando vero ad assensum, vel vnius partis, vel alterius, ita ut voluntas, aliquando exerceat solum quodammodo libertatem contradictionis, aliquando vero libertatem contrarietatis.

Aduertendum est tertio; Homines, **17** dum ex opinione probabili operantur, sic communiter procedere. Proposito intellectui obiecto probabili cum suis motiis; V. G. proposita opinione, quod beneficiorum pluralitas licita sit, quia usu iam, ac consuetudine, in Ecclesiam est introducta; vel motiva, intellectui apparente solidam, ac firmam, & cum Doctorum aucto-



auctoritate coniuncta, nec ullam rationem conuidentem contra se habentia; vel non? si talia non apparent; intellectus non vterius procedit, sed opinionem illam statim, tanquam parum probabilem reiicit; si vero apparent; ab illis mouetur ad iudicandum, talem opinionem esse verè probabilem, sive dignam, cui ipse probabiliter assentiatur tanquam vere, & Voluntas ab hoc iudicio, sive dictamine, statim mouetur ad imperandum ipsi intellectui assensum probabilem, quod beneficiorum pluralitas, licita sit, quia vnu iam, ac consuetudine, est in Ecclesiam introducta; Quia tamen intellectus, hoc probabiliter solum credit, non credit absolutè, sed solum quantum est ex vi talis motiu, & cum formidine, ac timore, quod hoc ipsum possit esse, ac fortasse sit falsum. Hoc facto, intellectus reflectens supra suum assensum probabilem, euidenter iudicat, illum esse prudentem, sive pendentem ab illo primo dictamine prudentiæ, tamquam effectum à sua causâ, ideoque se prudenter agere, dum ex vi talis rationis, probabiliter iudicat, beneficiorum pluralitatem esse licitam; & ab hoc assensu, quia prudens est, mouetur ad euidenter iudicandum, quod operatio voluntatis illi conformis, sit licita, sive digna, quæ à voluntate, vel eliciatur, vel imperetur; & hoc iudicium sive dictamen prudentiæ, est ultimo iudicium præcium, sive conscientia, à qua deinde voluntas mouetur ad operandum. V.G.ad plura beneficia, vel procuranda, vel acceptanda, vel retinenda,

<sup>18</sup> Aduertendum est quarto; operationem à voluntate sic elicitam, vel imperatam, duplii titulo esse prudentem. Primo re-

motè, quatenus remote pendet ab evidenti iudicio probabilitatis, sive à primo illo dictamine prudentiæ, quo opinio iudicatur digna, quæ credatur ut vera. Secundò proximè, quatenus immediate pendet, ac regulatur ab ultimo dictamine prudentiæ, quo operatio, illi opinioni conformis, iudicatur digna, quæ à voluntate ponatur, quod dictamen similiter, est iudicium certum, ac saltem moraliter euidens, quamvis appelletur conscientia probabilis, quia oritur ex prudenti assensu probabili, eique innititur tamquam motiu, à quo intellectus mouetur ad illud formandum. Quod autem hoc dictamen sit saltem moraliter certum, ac euidens, patet, ex eo enim, quod intellectus, prudenter operatur, dum probabiliter iudicat, beneficiorum pluralitatem, ex eo motiuo, esse licitam, euidenter sequitur, etiam voluntatem prudenter operari, dum hoc iudicium sequitur, eique se conformat, cum ipsa sit potentia cæca, & feratur in obiectum solum prout illi proponitur ab intellectu. Si ergo beneficiorum pluralitas, illi ab intellectu prudenter proponitur tamquam licita, ac honesta, impossibile est, ut à voluntate prudenter non ametur ut talis. Voluntas autem, dum prudenter operatur, peccare non potest.

Aduertendum est quintò; assensum 19. probabilem, cum feratur in suum obiectum solum probabiliter non iudicare, illud esse verum absolutè, sed solum præcius, & cum aliqua restrictione; scilicet; quantum ex vi motiu, quod habet ad talis assensum; sive potius indicare, obiectum ita apparere verum, ut tamen possit non esse, & fortasse non sit tale; Intellectus enim, dum probabiliter iudicat, beneficio-

neficiorum pluralitatem esse licitam, non tamen iudicat esse, quam apparere licitam ex vi motini, quod habet; imo simul, vel formaliter, vel virtualiter iudicat, posse, & fortasse non esse talem; Atque haec est formido sive dubitatio quædam late sumpta, quam, ex suo modo tendendi includunt omnes actus probabiles, & ratione cuius, esse non possunt ultima regula recte operandi; haec enim debet esse omnino certa, alioquin voluntas, illam sequendo, peccandi periculo se exponeret, & exponendo peccaret; Quamuis tamen assensus probabilis, ratione formidinis, ac dubitationis latæ sumptæ, quam includit, non possit esse ultima regula voluntatis, nihil tamen obstat, quin possit esse obiectum, ac motuum actus reflexi practici, certi, & evidenter, qui sit ultima, ac sufficiens regula voluntatis in operando; Intellectus enim, evidenter cognoscens, se prudenter operari, dum probabiliter iudicat, beneficiorum pluralitatem esse licitam, inde evidenter infert, etiam voluntatem prudenter operaturam, si se illi conformet in operando, cum eius ductum sequi debeat, ut potentia circa.

20 Aduertendum est sexto, duo dictamina prudentiae, quæ interueniunt dum quis, ex opinione probabili, operatur. Primum, quo intellectus iudicat, opinionem esse verè probabilem, sive dignam, quæ credatur; & secundum, quo iudicat, operationem voluntatis, iudicio probabili conformem, esse licitam, sive dignam, quæ à voluntate eliciatur, vel imperetur; non esse obligatoria per modum legis, sicut in assensu Fidei diuinæ, est iudicium evidens credibilitatis, sive de honestate credendi, illum praecedens; neque consultoria per modum consilij, sicut

est dictamen, dictans, præferendam esse continentiam matrimonio; sed concessoria per modum cuiusdam concessionis, ac permissionis; Hinc autem fit, ut voluntas, & que licite, opinionem verè probabilem sequi possit, ac relinquere, & sequi oppositam; Si enim haec etiam sit verè probabilis, ipsa etiam erit prudens, & consequenter radix dictaminis prudentiae, quod, si voluntas sequatur, peccare non poterit.

Aduertendum est septimo; opinionem probabilem, suam probabilitatem non amittere, ex eo, quod intellectui de novo motiva opposita probabilia proponantur; Cum enim haec supponantur non conuentientia, nec probabilitatis terminos excendentia, reddere non possunt opposita motiva improbabilia; alioquin iam terminos probabilitatis transgredentur, & fierent certa; improbabili enim non opponitur probabile, sed certum. Possunt ergo simul in intellectu dari motiva probabilia opposita, sufficientia ad oppositos assensus probabiles prudenter elicendos, saltem successiue; Dixi saltem successiue, quia non desunt, qui assentant, posse etiam ab intellectu elici simul, ut Vag. 1.2. q. 19. ar. 6. dis. 62. cap. 3. n. 10. Azor. lib. 2. cap. 16. qu. 2. Sanch. lib. 1. in dec. cap. 9. num. 12. & alij apud istos. Quid enim obstat, quominus intellectus simul iudicet, beneficiorum pluralitatem apparere licitam, quantum est ex vi consuetudinis, ac praxis Ecclesiæ; & simul apparere illicitam, quantum est ex vi motiuorum oppositorum; haec enim duo iudicia, cum non sint absoluta, sed præcisua, & de obiecto diuerso, non videntur contradictoria, neque opposita; Imo, cum utrumque, ita iudicet, suum obiectum apparere verum, ut simul iudicet, posse esse falsum,



## RESOLVTO.

**A** Deasum Respondetur. Clericum, 23 plura beneficia retinendo, nullo modo peccasse. Hæc opinio, in sensu explicito, est adeo communis, vt eam ha-  
cenus nemo, præter paucissimos recentiores citatos, absolutè negare ausus sit; ideoque eius Auctores, hic congerere, superfluum duxi; videri tamen poterunt apud Clauem Reg. lib. I. cap. 6. num. 4. Sanchez lib. I. sum. cap. 9. num. 14. Suar. tom. 5. in 3. p. disp. 40. sec. 5. n. 6. Vasqu. d. 62. cap. 4. num. 14. Azor. tom. I. lib. 2. cap. 16. qu. 2. Valentiam I. 2. disp. 2. quest. 14. par. 4. que. 4. Beganum par. 2. Theol. Schol. tract. I. cap. 4. quest. 9. num. 15. Filliuc. tom. 2. tract. 21. cap. 4. num. 128. Tanner. disp. 2. qu. 8. disp. 3. n. 36 Grana-  
dum. Contr. 2. tr. 12. disp. 4. sect. 3. Arag. 2. 2. qu. 63. art. 4. dis. penult. Maledrum. I. 2. quest. 19. art. 5. disp. 86. affer. 3. Martinez. tom. I. qu. 29. art. 6. Aluarez. disp. 80. Lorcam. tom. 1. disp. 39. memb. 2. Medinam. I. 2. quest. 19. ar. 6. quest. 5. Petrum Natur. lib. 3. de rest. cap. I. num. 269. Basiliu[m] Pontiu[m]. de Matrim. lib. 10. c. 15. num. 4. Ioannem Sanchez. disp. 42. num. 12. qui alios innumeros referunt.

Probatur autem evidenter, quia Cleri-  
cus, plura beneficia procurando, ac re-  
tinendo, secutus est opinionem verè pro-  
bablem, fundatam in vsu Ecclesie, se-  
quens autem opinionem verè probabilem,  
peccare non potest.

Primo. Quia opinio verè probabilis, 25  
est opinio rationabilis, ac prudens, vt  
paret ex dictis. Sequens autem opinio-  
nem prudentem, peccare non potest, cum  
non possit non prudenter operari, si  
enim ~

E

R. P. Beati Lib. I.



enim prudenter operatur, dum probabili-  
ter iudicat, beneficiorum pluralitatem  
esse licitam, qui fieri potest, ut pruden-  
ter non operetur, dum huic prudenti iu-  
dicio se conformat?

26 Secundò; Quia, si sequens opinionem  
probabilem, peccare posset, ideo eset,  
quia non haberet regulam recte operandi,  
eo quod opinio, cum sit formidolosa, &  
includat dubitationem, saltem latè sum-  
ptam non possit esse regulam recte operandi,  
nec illam sequens eximere se possit à per-  
iculo peccandi; Hoc autem evidenter est  
falsum; nam, licet ipsa opinio probabilis,  
non possit esse, per se, formalis, ac  
proxima regula recte operandi, ex eo ta-  
men, quod sit prudens, & ab intellectu  
reflexe cognoscatur, ut prudens, eundem  
intellectum mouet, ac determinat, ad  
certe, & evidenter iudicandum, licitum,  
ac honestum esse hic, & nunc, illi op-  
nioni se conformare; quod iudicium,  
est certum, & regula proxima infallibilis  
recte operandi.

27 Tertiò; Quia Voluntas, dum se-  
quitur opinionem probabilem, eique in praxi  
se conformat, non minus prudenter ope-  
ratur, quam, dum intellectum determi-  
nat ad ipsum assensum probabilem; non  
minus enim ad operandum, in uno casti,  
quam in alio, mouetur à dictamine pru-  
dentie; ad determinandum quidem in-  
tellectum, ab evidenti iudicio probabilis-  
tatis, siue de honestate probabiliter assen-  
tiendi, ad eliciendam vero, vel impe-  
randam operationem assensui probabili-  
conformem, ab evidenti iudicio confor-  
mabilitatis, siue de honestate illi assensui  
probabilis se conformandi. Si ergo, dum  
intellectum determinat ad assensum pro-

babilem, prudenter operatur, prudenter  
etiam operabitur, dum, in operando,  
eidem assensui se conformat. Imo pru-  
dentius operatur, dum assensui probabili-  
se conformat in operando, quam, dum  
intellectum ad ipsum assensum probabi-  
lem determinat; dum enim determinat  
intellectum ad assensum probabilem, ab  
vno tantum prudentiae dictamine imme-  
diatè regulatur; At, dum elicit, vel im-  
perat operationem illi assensui confor-  
mem, regulatur à duplice dictamine;  
immediate quidem à proprio, mediate  
vero, ab eodem, à quo regulatur etiam  
ipse assensus probabilis; Voluntatis enim  
operatio, ab utroque pendet tamquam à  
causa. Si ergo voluntas prudenter ope-  
ratur, peccare non potest.

Quartò; Quia impossibile est, pecca- 28  
re eum, qui certò, ac evidenter iudicat,  
se licite operari; ideo enim, qui ex con-  
scientia certe inuincibili operatur, non  
peccat, quia certò credit, se licite tunc  
operari. Sed qui sequitur opinionem ve-  
re probabilem, certo iudicat, se licite  
operari; certo enim iudicat se prudenter  
amare, quod illi prudenter ab intellectu  
proponit tamquam amabile; Ergo im-  
possibile est, peccare eum, qui sequitur  
opinionem vere probabilem.

Quintò; Quia, si Medicus, Infirmo 29  
medicinam proponat, ut probabiliter  
profuturam, hoc est, cum periculo, ne  
proficiat, & Infirmus certus sit, Medi-  
cum illum prudenter hoc proponere, quis  
dicat, Infirmum temere, & non prudenter  
operari, dum eam sumit? sed, quando da-  
tur opinio vere probabilis, intellectus vo-  
luntati proponit obiectum, ut probabili-  
ter, siue apparenter bonum, licet cum pe-  
riculo,

riculo, ne sit tale; & voluntas est certa, intellectum, illud prudenter proponere; Ergo non temerè, sed prudenter operatur, dum illud amplectitur. Si autem prudenter operatur, peccare non potest.

30. Sextò; Quia, si sequi non possemus opinionem verè probabilem, sed semper querere, ac sequi teneremur moraliter certam, fere nunquam licet operaremur; cum enim, in agilibus, paucissima sint moraliter certa, eo quod moralis certitudo, non nisi ex communi usu, ac omnium fere doctorum consensu, aut Ecclesiæ definitionibus habeatur; & in rebus fere omnibus moralibus, aliqui unam partem, alij alteram defendant, fere nunquam habemus moralis certitudinem, ad licite operandum, necessariam. Consequens autem, viam salutis, non solum difficilem redderet, sed moraliter impossibilem, & Christi iugum intolerabile.

31. Septimò; Quia, qui sequitur opinionem verè probabilem, non minus prudenter operatur, quam qui eleemosynam largitur pauperi; Sed hic, eleemosynam largiendo, nec peccat, nec, per se loquendo, peccare potest. Ergo nec ille, probabilem opinionem sequendo; Major probatur, quia ideo, qui dat eleemosynam, prudenter operatur, quia, in ea largienda, à prudentiâ, per hunc syllogismum evidenter regulatur: *Honestum est, dare eleemosynam pauperi, non solum verò, sed etiam prudenter apparenti;* alioqui fere nunquam exerceremus opus virtutis, cum fere nunquam de Petentis paupertate simus certi. Sed hic, qui petit eleemosynam, est pauper, vel verus, vel prudenter apparent. Ergo honestum est, huic eleemosynam dare, ita Card. de Lugo disp. § de fide f. 1, num. 16.

Sed etiam, qui sequitur opinionem verè probabilem, ab eadem prudentiâ, per similem syllogismum, regulatur; Regulatur enim per hunc: *Honestum est, operari iuxta opinionem, non solum veram, sed etiam prudenter apparentem;* alioquin fere nunquam honeste operaremur, cum fere nunquam de opinionum veritate simus certi; Sed hac opinio est, vel vera, vel prudenter apparent, quia est vere probabilis; Ergo honestum est, iuxta eam operari. Igitur etiam, qui opinionem probabilem sequitur, prudenter operatur. Aliter etiam syllogismus sic proponi potest: *Honestum est, amplecti bonum, non solum verum, sed etiam prudenter apparent;* quia voluntas non fertur in bonum, prout est in se, sed solum prout illi, per intellectum, proponitur, vel apparet, sive deinde in se sit, sive non sit tale; Sed bonum, per opinionem verè probabilem propositum, est vel verum, vel saltem prudenter apparent. Ergo honestum est, illud amplecti. Hoc argumentum, adeo evidenter conuincere videtur, ut nullum amplius rationabili dubitationi locum relinquit. Quid enim petunt probabilitatis Impugnatores? certam regulam operandi? en certissimam; certè, si dans eleemosynam, pauperi prudenter apparenti, certus omnino est, se prudenter operari, certus etiam omnino est, qui amplectitur opinionem sive bonum prudenter apparent.

Octauò; Quia, opinio verè probabilis, non solum habet vim dirigendi per modum regulæ, sed aliquando etiam obligandi per modum præcepti ad aliquid agendum; remotè tamen semper, ac radicaliter, modo explicato. Patet hoc evidenter, dum quis Ecclesiam in-

E 2 gredi-



greditur, tempore consecrationis; tunc enim obligatur ad hostiam adorandam, & tamen non habet plus quam probabilitatem, quod hostia illa sit consecrata; non enim certò constat, quod hostia illa sit ex tritico, & non potius ex hordeo, vel farre, aut alià simili materiâ; neque quod Sacerdos intentionem habuerit consecrandi, aut omnia verba necessaria protulerit; Cum præsertim, non semel sed sæpius, siue bona, siue mala fide, aliquis ex his defectibus contigerit; Quot, enim bona fide, & ob maiorem reuerentiam Sacramenti, hostias fecerunt ex Amylo, putantes, esse materialiam sufficientem: quot fecerunt aqua rosacea? quot, ob defectum pronuntiationis, ad alia distracti, in formâ Consecrationis, aliquam Syllabam necessariam omiserunt, & postea in se reuersi, de hoc ipso confessi sunt; sola ergo opinio probabilis, quod hostia sit consecrata, licet cum formidine oppositi; hoc est; cum iudicio, quod res possit aliter se habere; & de facto aliter sæpius se habuerit; potest habere vim, non solum directiuam, sed etiam obligatiuam, ad hostiam illam adorandam. Si autem habere potest vim obligatiuam, cur habere non poterit directiuam? certè, si prudentia formare potest hunc syllogismum evidenter obligatorium: *Reuerentia Christo Domino debita exigit, ut adoretur hostia, quoties vel est, vel prudenter appetat consecrata; Sed haec hostia, vel est, vel prudenter appetat consecrata; Ergoreuerentia Christo debita exigit, ut haec hostia adoretur.* Negari non potest, quin eadem prudentia, similem syllogismum evidenter concessiorium formare sic possit: *Licitè ponì pos-*

*test, quod, vel est, vel prudenter appetat li- citum; sed haec operatio, hic & nunc, vel est, vel prudenter appetat licita. Ergo hic & nunc licitè ponì potest.*

Nequè obstat periculum, cui quis se <sup>33</sup> exponit, materialiter violandi præceptum; Nam, etiam in hostiæ adoratione, exponit se quis periculo idolatriæ materialis, siue adorandi hostiam non consecratam; & tamen hoc periculum, non tollit obligationem, sed tamquam remotum, & nullum afferens incommode, omnino contemnitur. Ergo, eodem modo, simile periculum non tollit concessionem sed, tamquam nullum afferens malum, merito contemnetur. Adde, quod neque datur hoc periculum; nam operatio probabiliter licita, sicut non continetur sub obligatione præcepti, ita nec illud materialiter violat.

Multò minus obstat suspicio, vel formido, quod actio fortasse sit illicita. Nam, etiam in hostiæ adoratione, datur similis formido, quod hostia fortasse non sit consecrata; & tamen, quia non tollit prudentem assensum, quod sit consecrata, non tollit obligationem, quæ ex illo oritur. Sed etiam formido, quæ est cum opinione, siue assensu probabili, quod operatio sit licita, non tollit ipsum assensum probabilem; Ergo neque tollit concessionem, quæ ex ipso oritur. Atque hoc est, in quo aliqui decipiuntur, non distinguentes formidinem, siue suspicionem, quæ oritur ex opinione probabili, ab ea, quæ oritur ex conscientia erronea, vel ignorantia; cum tamen, toto Cœlo, inter se differant, & vna licitam operationem impedit, alia non impedit.

pediat. Formido, vel suspicio orta ex errore, vel ignorantia, impedit, quia quodlibet præceptum, eò ipso, quod de eo datur suspicio, statim obligat ad inquirendum, ut deponatur error, vel tollatur ignorantia, quæ eius obseruantiam impediunt. At, cum datur formido orta ex opinione probabili; Præceptum, sicut non obligat ad ipsam opinionem probabilem tollendam; ita non obligat ad tollendum formidinem ex illa ortam; Opinio enim probabilis non impedit obseruantiam præcepti sicut impedit error, vel ignorantia, sed potius tollit obligationem præcepti, cum nullum præceptum prohibeat, quæ prudenter, ac probabiliter iudicatur licita.

35 Nono denique & potest esse ratio à priori; Quia, quamdui dantur motiuæ verè probabilia pro vtrâque parte, nec veritas, nec probabilitas, siue apparentia veritatis, ad vnam potius partem obligare potest, quam ad aliam; Ergo voluntas remanet libera ad vtramlibet eligendam, non minus, quam, cum duo præcepta incompensabilia æqualia, aut fere æqualia, simul urgent.

36 Antecedens probatur; quia, quandiu pro vtrâque parte, dantur motiuæ verè probabilia; veritas omnino latet; cum enim vtrobique eidenter appareat, nec vtrobique esse possit, ubi vere sit, inuincibiliter ignoratur; Dixi inuincibiliter; quia, quandiu motiuæ, probabilitatis terminos non transgrediuntur, semper pro vtrâque parte datur eidens apparentia veritatis, ideoque ubi veritas sit, sciri non potest. Veritas autem, quandiu inuincibiliter ignoratur, obligare non potest voluntatem, quæ est potentia cæca, nec ferri potest in incognitum,

Similiter, neque probabilitas, siue apparentia veritatis, obligare tunc potest voluntatem; cum enim pro vtrâque parte detur, non est maior ratio, cur ad vnam potius obliget, quam ad aliam. Cum ergo voluntas, neque à veritate, neque à probabilitate, ad vnam potius partem, quam ad aliam, obligari possit, remanet necessariò libera, ad vtramlibet eligendam.

Neque obstat, quod probabilitas, siue apparentia veritatis, alicui videatur maior pro vna parte, quam pro aliâ; nam, hoc non sufficit ad inducendam obligationem, sequendi illam partem, & aliam relinquendi; quod enim illi videatur maior, non facit, quod vere sit maior, cum hoc otiri possit, vel ex eius ingenij imbecillitate, vim motinorum oppositorum penetrare non valentis, vel ex paruæ eorundem consideratione, vel ex speciali affectu ad eam partem, vel ex aliquo alio capite; vnde alteri fortasse eadem probabilitas videbitur minor. Excessus ergo tam modicus, & incertus, non videtur sufficiens ad obligandam grauiter voluntatem, ut eam partem determinate sequatur, & alteram relinquat; Unusquisque enim, semper iudicare prudenter potest; probabilitatem, quæ sibi videtur maior, ab alijs fortasse ingeniosioribus, aut prudentioribus, & ad eam partem minus affectis, iudicari minorem, nec suum ingenium, aut prudentiam, esse unicam probabilitatis mensuram.

Atque hæc est ratio, cur voluntas, dum opinionem verè probabilem sequitur, certa sit, se peccare non posse, sed recte, ac prudenter operari; Certa enim tunc est, & se non teneri, nisi ad sequendam ap-

parentiam veritatis, cum veritas ipsa omnino tunc lateat, ut dictum est; & apparentiam, quam sequitur, esse dignam, quam sequatur; cum ita sit certa, ut de ipsa prudenter dubitari non possit.

## OBIECTIONVM SOLVTIO.

**40** **I**Am, ad obiectiones omnes initio propositas, facilis est responsio. Ad primam. Negatur antecedens; Esto enim, Clericus habens motiva sibi, pro vtrâque parte contradictionis, proposita, vtramque partem simul iudicare non potuerit tanquam veram; vtramque saltem iudicare certò potuit, ut probabilem, siue prudenter apparentem. Hoc autem satis fuit, ut voluntas, intellectum ad alteram partem determinare posset, & sic dubium deponeret.

**41** Ad secundam; Negatur similiter antecedens; motiva enim, Clerico de nouo proposita, cum non fuerint plus quam probabilia, intellectum ad se rapere non potuerunt, & consequenter nec impedire voluntatem, ne intellectum determinaret ad ea contemnenda, ijsque non obstantibus, ad perseverandum in suo assensu. Quamvis autem concederemus, motiva de nouo aduenientia, positivam formidinem de falsitate sua opinionis generare potuisse, adhuc tamen, hoc sati non fuisset, ut Clericus retraheretur ab assensu probabili, quem habebat; formido enim, non est cum assensu probabili incompossibilis, imo est ejus proprietas.

**42** Ad tertiam; Negatur item antecedens; quamvis enim concederemus, Intellectum, propositis sibi motiuis probabi-

libus æqualibus, pro vtrâque parte contradictionis, ad neutram se posse determinare; hinc tamen non sequeretur, illum à voluntate, ad alterutram determinari non posse; cum enim neutrius partis motiva illum cogant ad assensum, remanet perfectissimè subiectus voluntati, à qua proinde, modo ad vnam, modo ad alteram partem determinari potest pro libito; imo, cum hæc subiectio, intellectui concedatur in ordine ad fidem, negari omnino non potest in ordine ad opinionem; motiva enim probabilia, longè minorem vim habent ad rapiendum intellectum, quam motiva fidei. Hoc autem admisso, pleraque Aduersariorum argumenta statim correunt.

Præterea falsum est, intellectum tunc **43** iudicare, vtramque partem, non minus apparere veram, quam falsam; tunc enim potius, vtramque partem iudicat apparere veram, licet cum periculo falsitatis; motiva autem vnius partis, tunc solum à motiuis partis oppositæ impediuntur, quando non datur imperium voluntatis, intellectum ad vnam partem impellens; verum, si hoc detur, statim impedimentum illud à voluntate superatur; sicut, quamvis duo pondera æqualia, in lance posita, illam in æquilibrio constituant, & vnum impedit, ne aliud lancem inclinet, si quis tamen lancem impellat ad unam partem, per impulsum, superat impedimentum ponderis existentis in lance oppositæ, sique lanx ad vnam partem determinatur, ac inclinatur.

Ad quartam; Negatur consequentia; **44** cum enim, in moralibus, veritatem fere nunquam certò assequi possimus, fere nunquam operari possemus. Melius igitur est,

est, sequi veritatem probabilem cum periculo errandi, quam illa omnino carere; sicut Infirmio satius est, medicinam sumere probabiliter profuturam, quamvis cum periculo, ne proficiat; quam ab illa omnino abstinere; & quando opinio est vere probabilis, intellectus, sicut prudenter opinatur, ita prudenter errandi periculo se exponit; se tamen, non voluntatem; Nam hæc, cum prudenter feratur in bonum, non pro ut est in se, sed pro ut illi proponitur, & apparet, errare non potest, cum obiectum illi per assensum probabilem propositum, vere appareat, vt bonum; Vnde ipsa, amplectendo bonum, quod illi probabiliter proponitur, nulli peccandi periculo se exponit, quia per iudicium reflexum certificatur, quod, sic operando, prudenter operatur; & hoc iudicium certum, est prudentia, siue conscientia. Potuit ergo Clericus prudenter eam opinionem eligere, eique in praxi se conformare.

**45** Ad quintam, Respondeatur primò; Argumentum hoc, sicut, & cœtera præcedentia, nimis probare: probat enim, ne ex imperio quidem voluntatis, Intellectum determinari posse ad alterutrius partis assensum, quando pro vtrâque parte habet proposita motiva probabilitia; hoc autem, non solum est contra quotidianam experientiam, qua experimur, nos, ex duobus ludentibus æque peritis, optare, vt unus vincat, quod fieri non posset, nisi probabiliter crederemus, illum esse vieturum; sed etiam manifestè contra rationem; cum enim neutrius partis motiva intellectum ad se rapiant, illum consequenter è magis relinquunt voluntati subiectum, quò motiva proposita sunt magis æqualia, alias assensus probabilis nun-

quam posset esse prudens, quia ad hoc necessario requiritur, vt sit liber, vt patet in fidei assensu; liber autem esse non posset, si intellectus ad illum à voluntate determinari non posset.

Respondetur tamen secundo; Negan-<sup>46</sup> do Sequelam; Esto enim; intellectus, dum unam partem iudicat veram, oppositam virtualiter iudicet falsam; at oppositam non iudicat simul veram, aut magis veram, sed solum probabilem, aut probabiliorē: In hoc autem, nullum est inconueniens; intellectus enim, utramque partem iudicare simul potest probabilem, licet non utramque veram; Adeo, quod intellectus, dum vni parti probabiliter adhaeret, illam non iudicat veram absolute, sed solum præcisiū, siue quantum est, ex vi talis motiui, quod habet; vnde nec oppositam iudicat absolute falsam, sed solum, quantum est ex vi eiusdem motiui; In hoc autem sensu, nullum videtur absurdum, quod intellectus, eandem partem iudicet simul, apparere veram ex vi vni motiui, & falsam ex via alterius oppositi; hoc enim, nihil est aliud, quam, intellectum simul iudicare, quod duo illa motiva opposita, de eadem parte ostendunt, vnum quidem veritatem, alterum vero falsitatem, in quo nullum videtur inconueniens, vt docent Vasquez disp. 62. cap. 5. num. 22. & Sanch. lib. 1. sum. cap. 9. nn. 10. & Azor. lib. 2. cap. 16. quæst. 2.

Ad sextam Respondetur; assensum opini-<sup>47</sup> natum, non esse regulam formalem operandi, siue dictamen illud, à quo voluntas immediatè regulatur, dum operatur; hoc enim, nos etiam fatemur, debere esse dictamen prudentiae, siue iudicium practicum certum,

certum, & infallibile de honestate hic & nunc operandi; sed solum radicalem quantum, ex eo, quod intellectus, aliquid prudenter proponit apparenter bonum, inde deducitur tamquam certum ac infallibile, quod voluntas, illud hic & nunc amplectendo, prudenter operatur; & hoc iudicium est voluntati regula formalis certissima recte operandi.

48 Ad septimam; Negatur Sequela; ex eo enim, quod opinionem verè probabilem sequi liceat, non solum nimia in operando licentia non oritur, sed potius certissima morum regula præscribitur, ut infrapatebit. Nimia in operando licentia, aliaque incommoda verè grauia, ex opinione non verè, sed ex leui quolibet motu, & apparenter tantum probabili, nascentur; Neque enim, ad probabilitatem opinioni conciliandam, leue quodlibet motuum sufficit, sed requiritur firmum, ac solidum, quod demum est tale, cum communi, vel saltem plurium doctorum suffragio iudicatur tale; opiniones igitur, leuibus fundamentis nixa, hæ sunt, quæ mores pervertunt, legum obseruantiam euertunt, ac licentiam verè nimiam, ac compescendam inducunt.

49 Ad octauam; Negatur Sequela; dum enim, cum opinione probabili operamur, datur in nobis iudicium certum de ipsa probabilitate; siue apparentia veri, & consequenter de prudentia ipsius assensus probabilis, ex quo deinde deducitur iudicium certum de honestate operandi, ex vi cuius iudicij, voluntas operatur; Hoc autem iudicium non datur, dum cum dubio operamur; &, si in nobis aliquando datur iudicium certum de honestate dubitandi, ex illo deduci non posset iudicium

certum de honestate operandi, sed potius de honestate abstinenti ab operatione; deduceretur enim iudicium certum de honestate; in praxi, illi dubitationi se conformandi; Voluntas autem, dubitationi intellectus se conformat, nihil operando, cum ab intellectu nullum ei bonum determinate tunc proponatur operabile.

Ad nonam; Negatur Sequela; qui enim sequitur opinionem probabilem, non operatur immediatè ex vi ipsius opinio-nis, siue iudicij probabilis, sed ex vi iudicij certi, quod ipsa opinio sit probabilis, ac prudens, ac proinde prudenter, ac honestè ad proxim reducibilis; quod ultimum iudicium, ex præmissis non probabilibus, sed certis est deductum; Sic enim deducitur; *opinio verè probabilis, est ad proxim honestè reducibilis, quia est prudens; sed hoc opinio, est verè probabilis, quia habet motus ad hoc requisita; ergo est ad proxim honestè reducibilis;* in hoc autem syllogismo, Omnes præmissæ sunt certæ, sicut sunt in hoc alio, qui æquivalenter est idem: *Qui opinionem moralem verè probabilem eligit, ac in praxi sequitur, certus est, se rectè operari, quia certus est, se operari prudenter; sed hoc opinio, est verè probabilis, quia habet motus ad hoc sufficientia; ergo qui illam hic & nunc sequitur, certus est se rectè operari;* vides hic nullam interuenire præmissam probabilem, sed omnes esse certas; Errant autem Aduersarij, quia putant, probabilitatis defensores asserere, quod voluntas operetur ex vi conclusionis, ex ipsa opinione, siue assensu probabilis, tanquam ex una præmissa deductæ, quæ conclusio non potest esse plus quam probabilis; verum ipsi etiam vltro hoc

hoc negant; atque hoc est, in quo plerique ex Aduersarijs, hostem sibi singunt, ac impugnant, cum tamen, ne de hoc quidem, sit quæstio.

## COROLLARIA.

**s. 1** Colligitur ex dictis primò, omnem opinionem eo ipso, quod est verè probabilis, esse omnino tutam in praxi; Tum enim dicitur, quod per se, & non solum ratione ignorantie inuincibilis, peccatum excludit; opinio autem, eo ipso, quod est certò probabilis, & consequenter prudens, per se, & essentialiter peccatum excludit; impossibile enim est, peccare eum, qui certus est, se prudenter iudicare, licitum sibi esse, hic & nunc operati; de hoc autem certus est, qui opinionem verè probabilem sequitur; hic enim certus est, opinionem illam esse dignam, quæ credatur, & consequenter se prudenter operari, dum eam credit licitam, ac ut talem sequitur; Qui autem certus est, se prudenter operari, per illam operationem peccare non potest, cum essentialiter sit prudens, & prudens à dictamine prudentiae.

**s. 2** Secundò; Inter opiniones probabiles, nullam dari alia magis, aut minus incompossibilem cum peccato, & consequenter magis, aut minus tutam, sed omnes esse cum illo æque incompossibiles, ac tutas; Cum enim omnes, eo ipso quod sunt verè probabiles, sint essentialiter prudentes, omnes sunt essentialiter incompossibiles cum peccato, non minus, quam sint incompossibiles, omnes actus contritionis; incompossibilitas autem cum peccato, consistit in inuisibili; vel enim excludit totum peccatum, vel nihil.

R. P. Beati Lib. I.

Quemadmodum ergo, inter actus contritionis, non datur unus alio incompossibilior cum peccato, ita inter opiniones vere probabiles, non datur una cum peccato magis incompossibilis, quam alia, & consequenter nec magis tutæ.

Tertio: Opinionem certò probabilem, cum sit essentialiter prudens, æque esse prudentem, siue faueat præcepto, siue faueat libertati; quod enim faueat præcepto, aut libertati, merè per accidens se habet, ac proinde eius naturam non mutat; sic, quia æque certò iudicare possum, probabile esse, quod res, quam possideo, sit mea, & consequenter quod eam retinere possim; & quod non sit mea, & consequenter quod eam teneat restituere; alteram prohibito, æque prudenter eligere possum, ac sequi quamvis una faueat præcepto, altera libertatis; quia utraque, cum sit certò probabilis, est etiam certo prudentis, & consequenter tutæ, & incompossibilis cum peccato. Motiva vero, quæ opinionem aliquam reddere possunt certo probabilem, imo etiam fortasse moraliter certam, sunt; Doctorum auctoritas; exempla, & praxis Virorum omni exceptione maiorum; præsumptiones; titulus possessionis; legitima consuetudo; Superiorum tolerantia in lege humana; regula ab inconuenienti vitando, vel promotori bono in iis, quæ mala sunt, quia prohibita, & similia.

Quartò: Opinionem, quæ non est certò probabilis, non esse, in praxi, tutam; quia eo ipso, quod dubitari potest, an sit probabilis, siue digna assensu probabili, voluntas intellectum prudenter determinare non potest ad eam iudicandam.

F

dam,

dam, ut veram, & consequenter nec ipsam, in praxi, prudenter sequi potest, ut talem; ad hoc enim prærequisitur iudicium certum, quo sciat, se prudenter iudicare illam esse veram, & consequenter dignam praxi, vel vsu, cum hoc iudicium reflexum, sit dictamen prudentiae, immediate regulatum ipsius operacionis, vel praxis, & à quo operatio habet, ut sit prudens, ac recta; Hoc autem iudicium nemo habere potest, nisi verè habeat opinionem, sive assensum opinatiuum prudentem; cum enim hoc iudicium, sit experimentale, ac reflexum supra ipsum assensum opinatiuum prudentem, illum essentialiter supponit. Si ergo voluntas intellectum prudenter determinare non potest ad probabiliter indicandum, quod opinio sit vera, neque illam prudenter sequi potest, in praxi, ideoque temere, ac imprudenter operatur, & consequenter opinio illa non est tuta; quid autem requiratur, ut de alicuius opinio-  
nis probabilitate dubitari non possit di-  
ctum est supra.

55 Quinto; hanc statui posse tamquam regulam generalem. In rebus moralibus, illam solam opinionem probabilem esse tutam in praxi, de qua dubitari non potest, quia sit probabilis; quia eo ipso, quod dubitare non possumus, quin sit probabilis, sive digna, quæ credatur tamquam vera, dubitare etiam non possumus, quin sit ad proximam reducibilis, sive digna, quæ ad proximam reducatur; usus enim, sive praxis, sequitur cognitionem, & voluntas intellectum. Hinc autem fit, ut usus opinionum probabilem, non cuiuscumque relinquitur arbitrio, sed ab hac certa regula dependeat, quæ tandem

in prudenti sapientum existimatione fundatur; Tunc enim demum de aliquà opinione dubitari non potest, quin sit probabilis, cum plures Doctores è de re ex professo, tractantes, in eà conuenient: difficile enim est, plures decipi. Quare, quamvis hæc vel illa opinio alicui videatur esse probabilis, non tamen propterea probabilis centenda est, nisi à pluribus saltem doctoribus, de eà ex professo agentibus, talis esse iudicetur. Atque ita sufficientissime tollitur nimia in sequendis opinibus licentia, ex qua tot incommoda in Christianam Rem publicam introducta sunt; & aliunde Fidelium conscientiae non nimis arctantur, singendo peccatum, ubi vere non est, nec esse potest, & reddendo bona opera moraliter impossibilia; sicuti fit ab ijs, qui ad recte operandum, moralē certitudinem requirunt.

Sexto; probabilitatem, in sensu longe 56 diuerso accipi, dum dicitur de opinione versante circa aliquam actionem nostram moralē, ac dum dicitur de alijs rebus; V. G. de materiâ & formâ Sacramentorum; de medicinâ; de iure litigantium; &c.; dum enim applicatur opinioni, significat, illam esse dignam assensu opinatiuo; dum vero applicatur V. G. medicinæ, significat, illam ita esse utilem ad sanitatem, ut tamen possit non prodesse. Hinc autem fit, ut non valeat argumentum à rebus propabilibus ad opinionem probabilem; quamuis enim Medicus teneatur adhibere medicamentum probilius, hoc ideo est, quia vel ex officio, vel ex charitate, vel ex conuentione tacita, vel expressâ cum Ægro, eius sanitatem, meliori modo, quo potest, procurare tenetur, ideoque adhibere debet media magis

magis ad hoc conducedentia; Hæc autem locum non habent in opinione probabili; neque enim homo tenetur meliori modo, quo potest, procurare salutem; aliqui status continentiae, non esset consilium, sed præceptum. Tenetur ergo solum propriam salutem simpliciter procurare, & consequenter adhibere media ad hoc utilia; Inter hæc autem est usus opinionis vere probabilis; nulla enim lege vetitum est, sequi opinionem vere probabilem, siue ponere operationem, quam certo probabile est, non esse vitiosam. Quod autem dictum est de Medico, dicendum est etiam de Ministro Sacramentorum; nam hic etiam ex officio, vel charitate, vel Ecclesiæ consuetudine, Sacramentorum valorem, quantum potest; procurare tenetur, ideoque materiam certam, vel probabilem adhibere, cum potest; idem de Iudice, cum hic etiam à Republicâ constitutus sit, ut uniuicique tribuat, quod suum est; idem de Tabellione, qui similiter, ex officio, contractuum, ac scripturarum valorem, meliori modo, quo potest, procurare tenetur; idem denique de alijs similibus.

§7 Septimò; Opinionem, quod in Sacramentorum administratione adhibere licet materiam probabilem, etiam quando adhiberi potest certa; saltē in ijs Sacramentis, quæ ad salutem sunt necessaria, vel in quibus, ex Ecclesiæ consuetudine, certus administrandi modus, est præscriptus; non esse probabilem; quia Ecclesiæ consuetudo, ac præceptum, sicut contrarium reddit certam, ita hanc reddit improbabilem. Si tamen non daretur Ecclesiæ consuetudo in contrarium; vel

nullum sequeretur inconveniens, tunc esset certò probabilis, eiusque usus proinde licitus, ut melius infra patebit.

Octauò; Magnam esse affinitatem, §§ inter assensum probabilem, & assensum Fidei, præsertim humanæ. Primo enim uterque est voluntarius, ac liber. Secundo, uterque debet esse prudens; sicut enim, qui citò credit, ita, qui citò opinatur, levius est corde: Eccl. 19. Tertio, uterque est voluntati regula infallibilis in operando; mediata tamen, siue radicalis, quatenus est radix, ex qua oritur dictamen prudentiae omnino certum, quod deinde est regula infallibilis immediata. Differunt tamen primo, quia assensus Fidei Divinæ est assensus firmissimus; opinatiuus verò, est formidolosus. Secundo, quia assensus Fidei Divinæ, oritur ex iudicio evidenti credibilitatis, obligante ad ipsum assensum; Opinatiuus verò, oritur ex iudicio evidenti probabilitatis, non obligante, sed concedente ipsum assensum. Hinc autem fit, ut voluntas, ipsum pro libito prudenter vel imperare possit, vel prohibere, ac oppositum imperare; & consequenter etiam prudenter, in praxi, sequi modo hunc, modo illum; iuxta diuersos fines; quos ad hoc præstandum habere potest. Et sicut, cum duo præcepta incompossibilia, & qualis ferè obligationis, simul videntur, quamcumque partem sequatur, peccare non potest: Ita, dum proposita simul habet motu verè probabilia pro utrâque parte, quamcumque partem sequatur, peccare non potest, quia semper prudenter operatur. Neque hoc est, conscientias laxare, sed regulam infallibilem recte operandi præscribere. Sicut, cum ad dandam prudenter



dentè eleemosynam pauperi, præscribitur opinio prudens, quod ille sit pauper, vel cognitio certa, quod appareat pauper, nec laxatur conscientia, nec restringitur, sed assignatur regula prudens operandi, modo supra explicatum. 31.

**§9** Nonò: Argumentum, quod contra opinionem probabilem afferri solet tanquam ineuitabile, nihil prorsus concludere. Sic enim arguitur. Qui suspicionem, vel formidinem habet, quod operatio aliqua sit illicita, absque peccato, eam ponere non potest; Sed qui probabilitate credit operationem esse licitam, habet simul formidinem, quod sit illicita. Ergo, qui habet opinionem probabilem, quod actio sit licita, eam absque peccato, ponere non potest. Hoc argumentum nullius prorsus est roboris; nam vel in maiori loquitur vniuersaliter de omni formidine, vel suspicione, aut scrupulo, & sic est manifeste contra omnes Theologos tam veteres, quam recentiores, & contra communem sensum Ecclesie; Omnes enim in hoc conueniunt, quod operari contra scrupulum (qui nihil est aliud, quam leuis quedam suspicio, vel formido, quod actio sit illicita) non solum liceat, sed plerumque etiam sit laudabile; Imò aliquando etiam necessarium; Et rationem reddunt; Tum, quia scrupulus, sicut non tollit iudicium determinatum, quod operatio sit licita, ita nec tollit dictamen prudentiae ex ea ortum, à quo voluntas infallibilitatem regulatur in operando; Tum quia, si, propter quamlibet formidinem, abstinentendum esset ab opere, de quo probabi-

liter iudicamus, esse licitum, nimis ardua esset ad Cælum via, cum homines valde raro, sine aliquâ formidine oppositi, veritates cognoscant in hac vita.

Vel in èadem maiori, sermo est solum 60 de suspicione, ac formidine, quæ cum errore, vel ignorantia est coniuncta; aut formido confunditur cum dubio; & tunc evidenter apparet, de hac, sermonem non esse in minori, ideoque argumentum nihil prorsus concludere; formido enim, quæ stat cum opinione, nec est, nec esse potest dubium, cum dubium essentialiter excludat adhesionem intellectus ad utramlibet partem, & consequenter etiam ipsam opinionem, sive iudicium probabile, quod operatio sit licita.

Imò: ex hoc ipso evidenter ostenditur, doctrinam de opinione probabili, in sensu explicato, non solum non esse nouam in Ecclesiâ, sed ab omnibus Theologis, tam veteribus, quam recentioribus, sine illâ controversia fuisse, semper admissam, & suppositam tamquam omnino certam; Cum enim doceant, licitum esse operari contra scrupulam, quia scrupulus, sive formido, non impedit iudicium determinatum, quod operatio sit licita; iam satis constat, eos admittere iudicium determinatum probabile; cum iudicio enim certo, vel evidenti, dari non potest formido, aut scrupulus partis oppositæ; hoc tamen iudicium probabile, non adsererunt tanquam regulam ultimam operandi, sed solum tanquam radicem, ex qua deinde oritur iudicium, sive dictamen reflexum omnino certum, quod est immediata, ac infallibilis regula voluntatis in operando,

Quod



**62** Quod si , quis affereret , vltinam regulam , requisitam ex parte intellectus ad operandum , posse esse opinionem , sive iudicium aliquod practicum solum probabile , is meritò impugnaretur , quia hoc iudicium , verè procedere non posset à Prudentiâ , quæ , cum sit virtus intellectualis , semper determinatè fertur in verum ; nec ullus vñquam posset esse certus , de rectitudine , ac honestate suæ operationis , prout requiritur ad rectè operandum ; Verum , hoc , aut nullus , aut ferè nullus vñquam ex Theologis admisit . Omnes enim , qui opinionem probabilem admittunt , afferunt etiam , ad rectè operandum , requiri necessariò dictamen prudentiæ , & Prudentiam , cum sit virtus intellectualis , debere esse , notitiam omnino certam agendorum .

**63** Decimò ; Quæ hactenus dicta sunt , valere in quacumque materia , dummodo in è dari possit evidenter de probabilitate vtriusque partis ; eo enim ipso , quod hæc dari potest , dari etiam potest necessariò evidenter de prudenti allens probabili ad vtramque , & consequenter etiam de prudenti vtriusque vsu , ac electione ; Vnde Iudex , duplìcem legis interpretationem inueniens , vtranique evidenter probabilem , modo vnam , modo alteram amplecti potest , eique in praxi se conformare ; dummodo tamen absit scandalum , & nullum sequatur inconveniens , & hoc est arbitrium , quod communiter Amicis promittunt Iudices , dum ab eis rogantur .

**64** Undecimo : Posse aliquem ruto sequi opinionem , quam iudicat evidenter probabilem , quamvis rationes oppositas solvere nesciat ; Nam licet ipse solutionem

ignoret , iudicare tamen prudenter potest , Eas ab aliis posse dissolvi ; nemo enim tantum iudicii , aut ingenii arrogare sibi debet , vt , quod ipse nescit , putet , etiam alios omnes ignorare . Imò , in iudicio de aliorum opinionibus ferendo , imprudenter ageret , qui eas improbabiles iudicaret , quia ipse rationes oppositas solvere nescit ; non enim ideo nescit , quia ipsæ , solui non possint , sed quia ipse hebetioris fortasse ingenij est , & non adeo perspicacis , vt alij , qui , illis vix auditis , statim soluerent .

Duodecimo : Posse aliquem sequi opinionem aliorum , si illam iudicer evidenter probabilem . Sic enim Arist . 1. Top . c. 1. & 1. Eth . c. 4. tradit ; Virorum sapientum consilium sequi , reprehendi non posse , & S. Tho . quolib . 2. a. 10. docet , posse vnumquemque amplecti opinionem , quam à Magistro audiuit in ijs , quæ ad mores spectant : Et ratio est clara ; quia , eo ipso , quod iudicatur evidenter probabilis , iudicatur etiam prudenter creditibilis , vt vera , & consequenter etiam prudenter eligibilis , vt bona . Vnde potest Confessarius , opinioni Pœnitentis se conformare , si eam iudicet evidenter probabilem ; Nec solum potest , sed tenetur ; Cum enim Pœnitens eam licite sequi possit , est ad absolutionem sufficienter dispositus , nec ullum habet impedimentum ; Confessarius autem , Pœnitenti disposito , sine gravi culpâ , absolutionem negare non potest ; Tum quia Pœnitens ad illam habet ius , ne priuetur bono Sacramenti ; Tum quia , positâ causâ iudicij , quæ est peccatorum accusatio , sive materia , sequi necessariò debet sententia sive forma ,

forma, ne mutilum reddatur Sacramen-  
tum. Tum denique, quia graue onus  
esset, Pœnitentem ad alium Confessarium  
remittere, præsertim, quando confessio  
facta est de mortalibus. Ita Doctores com-  
muniter, quos refert, & sequitur *Bal-  
dellus lib. 4. d. 13. num. 9.*

**66** Decimo tertio; Posse Subditum, sequi  
opinionem probabilem Superioris, eique  
se conformare, si Superioris opinio, circa  
materiam præceptam, sit verè probabi-  
lis; Si enim unusquisque sequi Pruden-  
ter potest aliorum opinionem in rebus  
suis, quando hæc est verè, ac evidenter  
probabilis, cur non opinionem Superio-  
ris, qui iuris præsumptionem habet pro-  
se? Imò aliqui volunt, Subditum te-  
neri tunc obediens, quia Superior ius ha-  
bet præcipiendi, quoties non constat, rem  
præceptam, esse illicitam, & sit in posse-  
sione istius iuris, ideoque melior est con-  
ditio ipsius possidentis, quam Subditi non  
possidentis. *Lessius tamen lib. 2. c. 41. d. 9.  
nu. 76. lo. Sanchez in selectis d. 73. Castro-  
pal. tr. 1. d. 2. p. 6. num. 5.* Etalii putant,  
Subditum tunc non teneri obediens; quia  
præceptum Superioris, strictius obligare  
non potest, quam præceptum Christi, &  
Ecclesiæ. Hoc autem non obligat, quan-  
do datur opinio verè probabilis, quod res  
præcepta non continetur sub materiâ  
præceptâ; sic enim Pœnitens, fateri non  
tenetur peccatum, quod probabiliter pu-  
tat, se non commisso; ergo neque præ-  
ceptum Superioris obligabit, quoties Sub-  
dito est evidenter probabile, quod res  
præcepta, vel sit illicita, vel limites iu-  
risdictionis excedat, Superior enim, po-  
testatem non habet præcipiendi, nisi li-

cita, & terminos suæ iurisdictionis non  
excedentia.

Decimo quartò: Eum, qui habet opi- **67**  
nionem verè probabilem de suâ iurisdi-  
ctione; licet habeat etiam proposita mo-  
tus contraria probabilia: posse iurisdi-  
ctionem exercere; Tum quia, dictam opi-  
nionem sequendò, prudenter operatur, vt  
patet ex dictis; Tum quia, quamdiù da-  
tur utrumque opinio probabilis de aliquâ  
re, eius veritas omnino latet. Quandiu  
autem veritas latet circa iurisdictionem,  
datur error communis, qui ex tacito Ec-  
clesiæ consensu, sufficit, ad illam con-  
ferendam. Hinc fit, vt Parochus, quam-  
uis sit in alienâ Parochiâ, aut Sacerdos  
non sit, assistere tamen possit Matrimo-  
nio, quia de hoc datur opinio verè pro-  
babilis.

Decimo quinto; Posse Confessarium, **68**  
iuxta opinionem verè probabilem, consi-  
lium dare Pœnitenti; & Aduocatum  
Clienti: Tum quia si Confessarius, & Ad-  
uocatus, ex illa opinione, proprias actio-  
nes regulare possunt, cur non etiam actio-  
nes aliorum, cum eadem sit ratio de omni-  
bus. Tum quia, sic humanæ infirmitati  
melius prospicitur, & plurima peccandi  
pericula vitantur. *Vasquez d. 6. c. 4. n. 8.*

Decimo sexto; Posse Aduocatum su- **69**  
mere patrocinium Clientis, quoties Hic  
item contestati liceat potest: hoc autem  
potest, quoties habet pro se rationes  
verè probabiles; his enim positis, licitum  
illi est, suum ius experiri; Nam, quod  
ipsi videtur solum probabile, Iudici for-  
tasse videbitur moraliter certum; vel,  
quod in principio discussionis videtur  
solum probabile, in progressu fortasse  
apparet moraliter certum. *Advocatus  
tamen*

tamen, Clientem admonere tenetur, quem gradum probabilitatis habeat eius ius, nè Cliens plūs speret, quām habet, alioquin ipse Aduncatus tenetur de dāmmo. *Vasquez* 1. 2. d. 64. c. 1. num. 4.

70 Decimo septimō; Non solum vsum opinionis probabilis practicæ, esse licitum, sed etiam speculatiuæ, per se loquendo, & cum nihil obstat. Opinio speculatiua dicitur illa, quæ est de aliquā re non factibili: vt, cum quis probabiliter iudicat, rem, quam possidet, esse suam; aliquam circumstantiam non mutare speciem, Coccolatam habere rationem non cibi, sed potus; & similia. Practica, dicitur illa, quæ versatur circa aliquam operationem nostram, vt faciendam, dictans, esse licitam, vel illicitam, honestam, vel in honestam; vt, cum quis iudicat, licitam sibi esse retentionem rei, quam possidet; talem circumstantiam non esse necessariò manifestandam in Confessione. Coccolatam, ieiunium non violare; & similia.

71 Vsus ergo etiam opinionis verè probabilis speculatiuæ, per se loquendo, est licitus. Tum quia, etiam opinio speculatiua, eo ipso, quod est verè probabilis, est prudens, non minus quam practica. Tum quia, opinio probabilis practica, regulariter deducitur ex simili speculatiua, tamquam effectus ex fūa causā, cum nihil obstat; ex eo enim, quod quis probabiliter iudicet, rem, quam possidet, esse suam, statim infert simile iudicium probabilis practicum, quod rem illam retinere licitè possit. Dixi tamen, cum nihil obstat, quia hæc illatio impedit aliquando potest, vel ab aliquo inconvenienti, quod ex vnu opinionis specula-

tiuæ sequeretur, vel ab aliquā lege eundem vsum specialiter prohibente: quamuis enim probabile sit, aquam ex sale resolutam esse materiam sufficientem baptismi; hinc tamen inferti non potest, probabile esse, quod adhiberi licitè possit ad baptizandum, quia eius vsum proximi salutem pericolo exponeret. Similiter, quamuis probabile sit, panem aquā rosaceā confectionam esse panem vnualem; probabile tamen non est, ipsum consecrari licitè posse, quia specialiter ab Ecclesiā prohibetur. Quando tamen nullum sequitur inconueniens, nec vlla datur prohibitio, aut consuetudo contraria: tunc vsum opinionis speculatiuæ non minus est licitus, quam practicæ. Ita *Suar.* 10. 4. in 3. p. d. 22. Sec. 3. nu. 5. *Sanch.* lib. 1. in dec. c. 10. n. 76. *Layman.* lib. 1. tr. 1. §. 3. num. 4. *Valentia* 1. 2. d. 2. q. 14. p. 1. *Vasq.* d. 62. c. 4. *Nauar.* c. 17. n. 280. *Petr.* *Nauar.* lib. 3. de rest. c. 1. d. 13. nu. 297. *Io. Sanch* plures referens d. 42. num. 12. *Diana* p. 2. tr. 13. ref. 1. & 5. & alii communiter.

Decimo octauo: Posse aliquas opinio- 72  
nes temporis decursu mutari, ita ut ex probabilibus fiant improbables, vel è contra. Potestenim aduenire vel noua lex, vel nouum decretum, vel de novo apparere aliqua ratio conuincens, quæ illas reddat improbables, vel è contra. Sic opinio, quod, qui alium occidit cum moderamine inculpatæ tutelæ, quamuis non peccet, fiat tamen irregularis, (quæ opinio apud antiquos erat communis), nunc non est amplius probabilis, quia in *Clem.* si *Furiosus*; de *homic.* statuitur oppositum: quod scilicet non fiat irregularis.

gularis. Similiter, opinio, quod detur obligatio sub mortali recitandi matutinam ante Missam (quam opinionem sequabantur antiqui) iam redditum est fere omnino improbabilis, cum Matutinum nullam prorsus habeat connexionem cum Missa extra chorum. Item opinio, quod habenti conscientiam peccati mortalis, Sacramentalis confessio ante communionem, necessaria non sit; quæ ante Tridentinum habebatur, ut probabilis; post Tridentinum facta est improbabilis; quia Tridentinum *sess. 13. cap. 11.* ad Ecclesæ pacem, & unionem conseruandam, & ad vitandum scandalum, aut aliud periculum, sub pœnâ excommunicationis prohibuit; ne quis eam opinionem pertinaciter teneat, aut publice doceat, vel prædicet. Denique opinio, quod in mortale peccatum lapsi, habitæ copiæ Confessarij, statim confiteri tenantur, quæ erat opinio *Alens. par. 4. quest. 77. memb. 4. ar. 2. S. Bonaventura dist. 17. par. 2. ar. 2. quest. 2. & aliorum.* modo censetur communiter improbabilis *cum S. Antonino par. 1. tit. 3. cap. 10. §. 10. S. Tho. in 4. dist. 17. qu. 1. ar. 3. & aliis communiter.*

**73** Decimononò: Quæ hactenus opinione probabili dicta sunt, intelligenda esse de opinione probabili, probabilitate moralis, non vero solum Logica, ut aliqui voluerunt; Illa opinio dicitur logicè probabilis, quæ, licet, ut plurimum aut fere semper verificetur, potest tamen aliquando non verificari; ut, quod sub accidentibus panis sit propria substantia; quod homo sit bipes; quod scriptura Notarii sit vera &c. Hæ tamen propositiones, dicuntur physice, ac moraliter certæ,

quia in eis, formido de falsitate, rationabiliter, ut leuis contemnitur; nemo enim dubitat de Notarii scripturâ, quia quamvis non repugnet, Notarium mentiri, ex eo tamen, quod sit persona publica, ac iurata, præsumitur non mentiri. Illa opinio dicitur physice, ac moraliter probabilis, quæ aliquando verificatur, aliquando non; ut, quod post Iridem sequatur serenitas; quod res, quam possideo, sit mea; quod hic & nunc sit media nox; quod votum non emiserim, dum non recordor &c.; Hæ autem dicuntur physicè, ac moraliter incertæ, quia annexam habent rationabilem formidinem de falsitate; ita enim puto, esse hic & nunc medium noctem; rem, quam possideo, esse meam; me votum emisisse &c. ut tandem de hoc ipso simus incertus; De opinionibus igitur, etiam hoc modo probabilibus, intelligenda sunt, quæ hactenus diximus, quia de his etiam potest esse quæstio, & de his etiam locuti sunt hactenus Doctores, ut eos legentibus evidenter constabit; quærunt enim, an, si sint duo horologia, quorum unum, aliud per quadrantem præcedat; possit quis in nocte bacchanalium, dum primum dat signum media noctis, adhuc carnes comedere, probabiliter putans, aliud esse verum, licet de hoc sit incertus. Hæc autem, est probabilitas moralis, non Logica; & de hac loquentes, fere omnes, assertant posse nos tunc in praxi sequi opinionem probabilem, dummodo sit vere probabilis. Cuius rei alia ratio vltior est potest; quia formido iudicio opinatio annexa, sicut ab illo non tollit, quin sit iudicium determinatum, prudenter dictans, hoc opus esse licitum; ita non impedit, quin voluntas



luntas prudenter illud sequatur in praxi; regulara tamen semper immediate ab alio dictamine prudentia certa, quod ex ipso iudicio probabili, non tamquam ex præmissa, sed tamquam ex motu, reflexè formatur, & hoc solum voluit *Sanch. in fam. lib. I. cap. 6.*

74 Vigesimo; Quæ dicta sunt de opinione, applicari posse etiam Fidei humanae; Hæc enim ab opinione differt solum in hoc, quod opinio nititur rationibus, vel à priori, vel à posteriori; Fides vero, extrinsecè Doctorum auctoritate. Auctoritas autem, vt sit apta ad reddendam questionem aliquam evidenter probabilem, & consequenter prudenti fidei assensu dignam, requirit primò; vt sit Doctorum, in eogenere, insignium, quales censentur communiter esse, qui eam impressis voluminibus, ex professo, accurate, & cum laude, tractarunt; de his enim iudicari prudenter potest; quod materiam illam profundius scrutati sint, ac optime nouerint, ideoque quod in ea non tam facile fuerint decepti. Secundò, vt Doctores illi non sint singulares, sed habeant socios; quamvis enim unus, aut etiam alter decipi fortasse potuerit; cum tamen plus videant oculi, quam oculus, eo ipso, quod tres, vel quatuor, aut quinque Doctores in aliquà materia insignes, in eâ conueniunt, prudenter iudicari potest, quod non omnes errauerint.

75 Hinc fit primò, vt in materia Theologica, vnius insignis Theologi auctoritas, longe maioris ponderis sit, quam quinquaginta Iuristarum, aut Canonistarum; de his enim, cum materias Theologicas vix à limine salutauerint, dubi-

*R. P. Beati Lib. I.*

tari semper meritò potest, quod terminos ipsos confundentes, sæpe, & in multis errauerint.

Secundò; Ut longe plus valeat auctoritas vnius Doctoris classici, qui rem ex professo tractauit, quam quinquaginta aliorum, qui more pecudum, sola aliorum auctoritate ducti eam obiter afferunt; In opinionum enim delectu, non tam attendendus est Doctorum numerus, quam sapientia, vt optime aduertit *Paulus Comitolus lib. 5. resp. mor. quest. 15.* Negari autem non potest; quin Theologis recentioribus, cum vere Classici sunt, magis deferendum sit, quam Antiquis. Sicut enim, in cœlo, à recentioribus Astronomis, nouæ veritates detectæ sunt, quæ Antiquos latuerunt; ita à recentioribus Doctoribus, in Theologîa, alijsque materijs; Neque hoc mirum videri debet; nam, cum *Sapientia infinitus thesaurus sit hominibus; Sap. 7.* nouæ semper ex eo veritates extrahi possunt, ita *Sanchez lib. I. in dec. cap. 9. num. 11.*

Vigesimo primò: Syllogismum certum, ac evidenter, cuius conclusio, est dictamen prudentia, à quo proxime regulatur quicumque opinionem vere probabilem sequitur; esse huiusmodi: *Licitum est, ponere operationem, quam certò probabile est, non esse vitiosam;* eo enim ipso certo digna est, que prudenter credantur non esse vitiosa, & consequenter etiam, quæ tamquam non vitiosa, prudenter ponantur. Sed certò probabile est, hanc operationem non esse vitiosam, ut eius motiva ostendunt. Ergo licitum est, eam ponere. En syllogismum undequeaque certum ac evidenter. Ne mireris autem lector, quod illum toties, sub variis terminis

G

minis



minis proposuerim, quia hoc semel perfecte intellecto, difficultates omnes, quæ in hac materiâ fieri possunt, statim evanescunt; ut consideranti facile patebit; Et ex eius ignorantia, ortæ sunt questio- nes fert omnes, contrâ opinionem probabilem, excitatae. Hunc verò syllo- gismum requiri ad prudenter operan- dum, docent S. Thom. quolib. 8. art. 13. Nauarr. c. si quis. num. 63. dist. 7. de pen.

Suar. de cens. disp. 40. sec. 5. num. 14. Card. de Lugo de fide disp. 5. sec. 1. num. 16. Laym. lib. 1. tract. 1. cap. 5. §. 1. Lessius lib. 1. cap. 1. disp. 1. Ariaga tom. 3. disp. 23. sec. 2. subs. 2. Salas. 1. 2. tr. 8. sec. 5. Azor. par. 1. lib. 3. cap. 25. quest. 12. Clavis reg. lib. 1. cap. 13. num. 13. Sanch. lib. 1. ca. 6. & lib. 6. cap. 3. & alii ferè omnes communiter, cum prudentia debeat esse notitia certa agendorum.

## QV AESTIO VI.

*An conscientia practicè dubia possit esse regula operandi.*

C A S V S.

**M**VLIER quædam, nondum certa de morte Mariti, alteri nupserat; Post Matrimonium verò dubitare cœpit, an secun- do Marito petenti, posset debitum reddere. Cum hoc tamen dubio, petenti reddidit; queritur; Virum mortaliter peccauerit.

- SVMMARIVM.  
 2 Quid intelligatur nomine conscientia du-  
 bia.  
 7 Quid, & quotplex sit dubium.  
 8 Quid sit dubium speculatum, quid  
 practicum.  
 9 Vxor debitum reddens cum dubio pra-  
 ctico, mortaliter peccat.  
 10 Operari cum dubio practico, est intrin-  
 secè malum.  
 11 Est contra præceptum, quod prohibet  
 operationem.  
 12 Qui cum dubio practico operatur, sal-  
 tem indeterminatè, vult malum.  
 13 Necessariò male operatur.

- 14 Operari cum dubio speculatiuo, potest  
 non esse malum.  
 15 Quando non est malum.  
 16 Dubitans de vtrâque parte, vel minus  
 malam, vel vtramlibet eligere potest.  
 17 Ad peccandum sufficit dubium; quod  
 operatio sit illicita.  
 18 Conscientia dubia non est propriè con-  
 scientia.  
 19 Operans cum dubio, committit pecca-  
 tum illius speciei, de quâ dubitat.  
 20 In dubio practico, pars tutior nece-  
 ssariò est eligenda.  
 21 Conscientia obiectiuè dubia, in quo dif-  
 ferat à dubia formaliter.

RATIO-

